

Date – 14/09/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Ram chhung hmun dang rualin vawiin khan Mizoramah Hindi Ni (Hindi Diwas) hman a ni.
2. Chief Minister Pu Lalduhoma'n Kaladan Multi-Modal Transit Transport Project nakumah an peih tawh dawn avangin Mizo thalaite tan Hindi leh tawng hrang hrang dang thiam a ngai a ti.
3. Union Home Minister Amit Shah-a chuan India-a tawng chi hrang hrang hman a ni chu a chakna anih thu a sawi.
4. BRICS hruaitute chuan energy lama intodelh chu ram leh khawtlang hmasawna, ram venhimna leh mipuite hamthatna tura lungphum pawimawh tak anih thu an sawi.

<><><>

GOVERNOR-HINDI DAY

Ram chhung hmun dang rualin vawiin khan Mizoramah Hindi Ni (Hindi Diwas) hman a ni a. Greenhill Public School, Aizawl buatsaih Aizawl Vanapa Hall-a Hindi Concert chu Larsap General (Retd) Vijay Kumar Singh-an a hmanpui a, Education Minister Dr. Vanlalhlana leh Forest Minister Pu Lal Thansanga te pawh an tel a ni.

Larsap chuan Hindi thiam a pawimawh thu leh zirna kawnga danglamna siam a tul thu sawiin, hnam ziarang behchhan leh vuan chung zelin inthlak danglamna kalpui tur a ni a, a nih loh chuan hlawhtlinna a neih theih dawn lo, a ti. Mizoramin talent tha tak tak a neih tam thu sawiin, heng talent-te hi state chhungah chauh a tawp mai loh nan state pawn leh khawvel hmun dang thlenga pho chhuah a ngai a, hemi tur hian tawng dang zir a pawimawh a ni a ti.

Tawng dang thiam chu zirna, hnathawhna, sumdawnna leh khualzin dawnsawn kawnga a tangkai thu sawiin, Mizoram sawrkarin zirna inah "Thlakhata nikhat hindi tawng hman ni" kalpui a tum chu lawmawm a tih thu a sawi a. Zirlaite chu midangte hnam ziarang, nunphung leh tawng zir turte, lehkhabu chhiar zau tur leh India history-te zir nasa turin a chah a. Tum sang tak neia taima taka lehkha zir turin a chah a ni.



CM

Chief Minister Pu Lalduhoma’n Kaladan Multi-Modal Transit Transport Project (KMTTP) chu nakumah an peih anih tawh dawn avangin Mizo thalaite tan tawng hrang hrang- Hindi, Kawl tawng, Japanese, leh Chinese tawng Mandarin thiam a pawimawh dawn a ti.

Vawiina Mizoram Hindi Prachar Sabha buatsaih Hindi Day lawmna a hmanpuinaah he thu hi sawiin, Chief Minister Pu Lalduhoma Hindi tawng chu tute tan pawh a pawimawh hle a ti a. Sumdawnna ah pawh tawng ber an thiam loh chuan a harsat thin avangin Hindi chu a pawimawh tual tual dawn a, khawvel chu lo her danglamin, Mizoram chu ram hrang pawh lo ni se, India chu ram thenawm a nih reng dawn avangin insumdawngtawn reng tur an ni a chuvangin Mizote tan Hindi thiam chu a pawimawh hle a ni a ti. Hetihruah hian Chief Minister chuan Hindi-a tawng leh Hindi hla sak avanga an hnam inchei anga inchei chu hnam tihboralna a ni tih sawiin, Mizo culture vawng nung chungah Hindi-a tawng thiam chu a tawh tih a sawi a ni.

Hei bakah hian Chief Minister chuan Kaladan Multi-Modal Transit Transport Project (KMTTP) chu nakumah an peih tawh dawn avangin Mizo thalaite tan tawng hrang hrang thiam a pawimawh hle dawn a ti a. Tunah pawh mimala sumdawnna a lian em em tawh a, kawl tawng thiam lo tan a sumdawn theih tawh loh niin a sawi bawh a ni.



HINDI DAY

Education Minister Dr. Vanlalhlana’n mi tam zawkin Hindi a tawng an thiam theih nan Mizoram school ah te Hindi Speaking day an siam a, Hindi zirtirtute pawh an ennawn tha leh dawn a ti.

Vawiina Mizoram Hindi Prachar Sabha buatsaih Hindi Day lawmnaah Dr. Vanlalhlana chuan he thu hi sawiin, Hindi chu hnamdang te nena min thlunzawmtu, eizawna kawng hawngtu pawimawh tak a nih bakah India rama cheng nih bawk avangin Mizo hnamzia tibuai lovin Hindi tawng a thiam theih tih hriat a ngai a ti. School Education department hnuaia education reform committee chuan inbiakpawhna lamah tan lak a ngai nia an hriat avangin, Mizoram school ah te thla khatah ni 1 Hindi Speaking day an siam a, hemi atana Guidebook an siam chu school hrang hrangah an sem tawh tih sawiin, Hindi Speaking day hmanni pawh an ti zing chho zel dawn tih a sawi a ni.

Dr. Vanlalhlana chuan school thenkhatah Hindi zirtirtu Hindi tawng a tawng thei mang lo an awm tih sawiin, Hindi hawrawp chhiar thiam ringawt lova, tawngchhuah an thiam theih nan Hindi zirtirtute pawh an ennawn tha leh dawn tih a sawi a ni.

Dr. Vanlalhlana chuan vawiin Hindi Day lawmna a Hindi subject-a Phd degree nei thar te leh Traffic Police Hindi Spoken zirchhuak chawimawina dawngtute chu chhuanawm a tih thu sawiin, Sairang a taxi driver te pawh khualzin phurtu an nih angin, Hindu spoken zirtir tha a tih thu a sawi bawk a ni.



ZPM

Home Minister Pu K. Sapdanga'n Chief Minister leh Party President kawp a thatna leh that lohna a awm a, an Party chuan kawp loh an enchhin tawh a, kawp an enchhin leh dawn a ti.

Vawiina ZPM General Headquarters party office-a chhung inkhawm a hmanpuinaah he thu hi sawiin, Pu Sapdanga chuan ZPM party danglamna pakhat zinga mi chu Leader an nei chu a ni a ti a, hetihlai hian Leader ber party hruaitu nih theih loh chu a fel lo hle a. Chief Minister leh Party President kawp a thatna leh that lohna a awm tih sawiin, kawp loh an enchhin tawh a, kawp an enchhin leh dawn a ti a. An Party-in hruaitu thar an nei tur chu an uluk em avangin an thukhawm zing hle a, Party leh sorkar tana tha ber tura rin an thawh khawm angin, an rel chhuak tha viau niin a sawi bawk.

Home Minister chuan an party kalphung te, sorkar an enkawl danah te an in enna tur darthlalang fiah ber chu Kohhran a ni tih sawiin, Kohhran mite chu an party lakah an thikthu lo chhe bik deuh mahse an inhmeh bik a, Pathian lung an tih awi zel chuan Mizoramah ro an rel zel dawn a ti a. Technology chu an party in an hmang tangkai hle tih sawiin, patling insum thei lo deuhten committee chhung thu an lo tih put (leak) a awm thin a ti a, an party chu rorellai party an nih avangin mi en bik an ni a, hetiang thil hi an tuar bik dawn tih sawiin, fimkhur taka an hman loh chuan an party pawt hniamtu a la ni dawn a, an chakna hnar pakhat kha a chak lohna hnarah a chang thei tih a sawi a ni.



SUPPLY MINISTER

Food Supplies & Consumer Affairs Minister Pu B. Lalchhanzova Pisa ah Indradhanush Gas Grid Limited (IGGL)-in Tripura a Panisagar atanga Sihhmui thlenga Natural Gas kalna tur pipeline phum chungchanga hmalakna leh harsatnate vawiin khan sawi ho a ni.

Pu B. Lalchhanzova chuan Gas Pipeline atanga natural gas hmang state ni turin March 2027-ah gas pipeline phum hna hi zawh beisei a ni a ti a, Tuidam leh Darlak inkar Km 1.5 tuna IGGL te pipeline phumna turah harsatna an tawh thu thlalehah enfel tum a ni a ti. Minister chuan Mizoram Sawrkarin IGGL gas pipeline chu a hunah tha taka zawh a nih theih nan theihtawp a chhuah pui zel dawn a ti a, Commerce and Industries Dept. te pawh an inhawn thu sawiin an ram mamawh pawh a rang thei anga an tih fel sak zel thin thu leh hmalakna dang te pawh an umzui sak zel dawn thu a sawi a ni.

Vawiin vek hian Pu B. Lalchhanzova pisa-ah hian Land Revenue and Settlement Department hotute chu thukhawmin an Dept. hmalakna te an thlir hova, department hmachhawp te an sawi ho. Pu B. Lalchhanzova chuan Revenue Department dawrtuten department a thawktute an fakna thawm a hre ta fo chu hmasawinna nasa tak ni a a hriat thu a sawi a, thawktute chu tan la zel turin a chah a ni.



AR

Assam Rifles leh Mizoram Police tangkawpin Lalramthanga, kum 50 mi, Saron Veng, Aizawl hnen atangin dan lova kawl pistol an man.

Assam Rifles tarlan danin, an thudawn bawhzuiin Assam Rifles leh Mizoram Police tangkawp chuan tun thla ni 12 khan Saron Veng, Aizawlah USA siam .32 mm calibre pistol pakhat, a magazine leh a mu pathum an man a. Hemi chungchanga Akashvani News Aizawl zawhna chhangin Aizawl Police te chuan Lalramthanga hi Arms Act hnuaiah thubuai siam sakin, thu zawhfiah turin an kawl mek a ni.



MZP

Mizo Zirlai Pawl (MZP)-in Mizoram chhunga hnam dang Petrol pump enkawl leh hnam dangte thawhna Petrol pump chu September ni 17 atanga khar turin a hriattir.

Vawiina MZP General Headquarters thuchhuahin a tarlan danin, Mizoram chhunga hnam dang Mizo hming hawh leh hnam dang sumdawng an rawn pung chho zel chu MZP chuan a vei takzet a, hei hi hnam anga in chimralna kawng hawngtu zau tak a ni tih sawiin MZP chuan a tawp thlengin hma a la zel dawn an ti a, Mizoram chhunga hnam dang Petrol pump enkawl leh hnam dangte thawhna Petrol pump chu September ni 17 -Ningani atanga khar turin MZP chuan a hriattir a.

Hemi bawhzui nan hian, MZP Headquarters, Sub Headquarters, Branch leh Hnampual zirlai pawl a an thawhpui zawng zawngte chu mahni huam chhunga Petrol pump inkhar zawng zawngte lo chhinchhiah tur leh a tul anga Petrol pump neitute hming leh an sumdawnpui hnamdang te lo chhinchhiah vek turin an hriattir a. Heng hnam dang sumdawnpui a, September ni 17 a mipui dawr theih loh a inkhar zawng zawngte chu a tul anga an hming puanzar a ni dawn tih a tarlang a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MNF

MNF Party chuan an party working president ah Sr Vice President Pu Tawnluia an dah a,

Hemi chungchang hi vawiin khan thuchhuah siamin, an party chu tluang leh chak zawka a kal zel theih nan an hruaitute te inruat belh an ni tih an sawi a, President Pu Zoramthanga bakah Working President hi dah tharin, Vice President thar pahnih Pu Lalchamliaana leh Pu D. Thangliana te ruat an ni bawk a ni.

Tihian MNF Party Vice President ni mek, Pu Lalchhandama Ralte leh Pu Vanlalzawma te bakah midang 2 ruat belhin Vice President 4 an nei dawn ta a ni.



HINDI DIWAS

Union Home Minister Amit Shah-a chuan India-a tawng chi hrang hrang hman a ni chu a chakna anih thu a sawi. Vawiina Hindi Diwas puala a thuchahah he thu hi sawiin Pu Shaha chuan Hindi tawng chu tawng dangte el tur niloin rampum suiikhawmtu pawimawh tak a ni a ti a. Kumpinu awpbehna rilru paihbo turin tawng a pawimawh thu sawiin Sap ho dan siam te chu thlakin Bharatiya Nyaya Sanhita, Bharatiya Nagarik Suraksha Sanhita leh Bharatiya Sakshya Adhinyam tia siam danglam a ni a ti a. Hei tawng danga thlak satliah mai niloin kan nihna chhuang taka tarlanna a ni zawk a ti.

Union Home Minister chuan Prime Minister Narendra Modia kaihhruaina hnuaiah Hindi leh tawng dang chi hrang hrangte chuan nasa takin hma an sawn a ti a. Tunhnaia khawl changkanna hmang tangkaiin awlsam takin tawng a leh theih tawh a ti bawk.



BRICS ENERGY

BRICS hruaitute chuan energy lama intodelh chu ram leh khawtlang hmasawnna, ram venhimna leh mipuite hamthatna tura lungphum pawimawh tak anih thu an sawi. Ni hnih awh BRICS Summit New Delhi-a neih zawh takah khan member ramte chuan energy lama hnianghnarna tur chi hrang hrang an sawiho a. Heng zingah hian energy zawrh leh hralhna lam tihchangtlun leh chhum lo chat lova energy te phurhkual bakah energy kaihhnawih hmasawnna ruhrel pawimawh humhim a pawimawh thute an sawi a. He hunah hian Prime Minister Modia chuan technology leh mineral vang ho ralthuam atana hman chu hmasawnna daltu a ni thei tih a sawi bawk a ni.

